

**SPORAZUM
O IMPLEMENTACIJI OBAVEZA ENTITETA
IZ KONAČNE ARBITRAŽNE ODLUKE ZA BRČKO
KOJE SE ODNOSU NA SNABDIJEVANJE ELEKTRIČNOM ENERGIJOM**

BRČKO, 25 SEPTEMBAR 2001.

Vlada Brčko Distrikta Bosne i Hercegovine

Vlada Federacije Bosne i Hercegovine

Vlada Republike Srpske

**Pod pokroviteljstvom zamjenika visokog predstavnika i supervizora za Brčko,
ambasadora Henrija L. Klarka**

U cilju sprovedbe Konačne arbitražne odluke donešene od strane Međunarodnog arbitražnog tribunala za Brčko, od 05. marta 1999. god. i uspostavljanja Brčko Distrikta Bosne i Hercegovine (u daljem tekstu: Brčko Distrikt) kao jedinstvene administrativne jedinice pod isključivim suverenitetom Bosne i Hercegovine;

Podržavajući integraciju, širenje i poboljšanje elektro-distributivnog sistema na teritoriji Brčko Distrikta;

Uvažavajući činjenicu da je Brčko Distrikt vlasnik cjelokupne imovine prijašnjih dijelova preduzeća za distribuciju električne energije koja se nalaze na teritoriji Distrikta;

U cilju ravnomjernog obezbjeđivanja usluga snabdijevanja električnom energijom svih potrošača u Distriktu;

Unapređujući Memorandum o razumijevanju, od 19. septembra 2000., i Sporazume zaključene 24. oktobra 2000. između entiteta i Brčko Distrikta;

Strane prihvataju sljedeće:

Predmet sporazuma:

Regulisanje međusobnih odnosa iz oblasti pravnih, ekonomskih, tehničkih i drugih značajnih pitanja, vezanih za način snabdijevanja Brčko Distrikta električnom

energijom, te razvoj prenosne i elektrodistributivne mreže na teritoriji Brčko Distrikta i bližeg okruženja.


1. Brčko Distrikt će osnovati pododjeljenje koje će se zvati Pododjeljenje za elektrodistribuciju (u daljem tekstu Pododjeljenje), koje će nuditi jedinstvene tarife i nivoe usluga svim potrošačima. To Pododjeljenje će raditi pod direktnom kontrolom Vlade Brčko Distrikta do uspostavljanja nezavisne nadzorne/regulatorne agencije ili komisije.
2. Prioritet Pododjeljenja će biti bliska saradnja sa elektroprivredama RS i FBiH u cilju kreiranja efikasne tržišne strukture unutar jasnih regulatornih okvira koji podstiču konkurenciju na tržištu električne energije, privlače privatne investitore i osiguravaju ekonomski zdrav sistem.
3. Glavni investicioni zahvati u elektro-sistemu Brčko Distrikta su potrebni zbog (a) zadovoljavanja buduće potrebe za električnom energijom, (b) usklađivanja sa BiH i međunarodnim "cost-effectiveness" standardima (c) obezbjeđivanja kvalitetne usluge, (d) očuvanja integriteta sistema i (e) obezbjeđivanja potpunog povrata troškova usluga, uz razuman povrat investiranih sredstava.
4. Pododjeljenje će biti jedini distributer električne energije u Distriktu i imaće slobodu izbora dobavljača električne energije bilo iz BiH, ili inostranog(ih) dobavljača ili kombinacije istih, i ponašaće se u skladu sa budućom zakonskom regulativom donešenom na nivou BiH.
5. Elektroenergetski objekti za distribuciju električne energije, odnosno do nivoa 35 KV, uključujući i nivo od 35 KV koji nisu u sastavu objekata elektroprenosa, kao i dio rezervnih dijelova, vozila, opreme i drugog materijala, potrebnih za obavljanje djelatnosti distribucije električne energije u Brčko Distriktu, koji *su bili* u nadležnosti "Elektrodistribucije" Tuzla i "Elektrodistribucije" Bijeljina, u nezavisnim preduzećima koja se nalaze na teritoriji Brčko Distrikta i koja su *bila* u vlasništvu JP "Elektroprivreda BiH"/Elektrodistribucija Tuzla i JMDP "Elektroprivreda RS"/ZDP Elektrodistribucija Bijeljina postali su vlasništvo Vlade Distrikta Brčko/Pododjeljenja od 1. januara 2001. Konkretniji detalji o dodjeli i prenosu ovih sredstava biće navedeni u posebnim aneksima ovog Sporazuma.
6. Pododjeljenje je, u skladu sa organizacionom šemom Odjeljenja za komunalne poslove Vlade Brčko Distrikta, preuzelo radnike koji su bili zaposleni u dijelovima elektroprivreda Federacije BiH i RS na dan 31. marta 2000. Radnici će svoja prava ostvarivati u skladu sa važećom zakonskom regulativom Brčko Distrikta i Sporazumom o implementaciji obaveza entiteta iz Konačne arbitražne odluke od 24. oktobra 2000.

7. Utvrđivanje naknada i tarifa za usluge snabdijevanja električnom energijom, do uspostavljanja regulatorne komisije, će biti isključivo pravo Vlade Brčko Distrikta. Distrikt će uspostaviti tarifne stavove koristeći proceduru za formiranje tarifa, preporučenu u studiji "Tarife električne energije i šeme socijalne zaštite" koja je urađena za potrebe Bosne i Hercegovine, a uključujući preporuke za tretiranje socijalnih slučajeva kao sastavnog dijela socijalne pomoći.
8. Isporučiocima električne energije ugovorene od strane Odjeljenja za komunalne poslove Vlade Brčko Distrikta su odgovorni za kvalitet (napon i frekvenciju) isporučene električne energije i biće obavezni da instaliraju propisno baždarenu opremu za očitavanje na svim ulaznim i izlaznim mjestima preuzimanja i predaje električne energije Pododjeljenju, u skladu sa pregovorima i zajedničkim nastojanjima da se omogući visoki kvalitet očitavanja svih potrebnih parametara električne energije. Uslovi isporuke, uključujući cijenu električne energije i obračun troškova na zajedničkim objektima, biće regulisani Ugovorom o uslovima isporuke električne energije sa isporučiocima, koji će biti potpisan sa isporučiocem(ima) i biće Aneks ovog Sporazuma, a nakon provedene procedure nabavke.
9. Vlada Brčko Distrikta će biti odgovorna za odobravanje izgradnje, proširenje, razvoj, funkcionisanje i održavanje svoje elektro-distributivne mreže, kao i za odobravanje rekonstrukcije postojeće i izgradnju nove prenosne mreže na teritoriji Brčko Distrikta.
10. Sva dugovanja za električnu energiju isporučenu potrošačima na teritoriji Distrikta do 31. marta 2000. godine nisu obaveza Distrikta. Entiteti imaju pravo da, koristeći sva raspoloživa pravna sredstva, naplate svoja potraživanja prema potrošačima nastala do 31. marta 2000. Distrikt će sa svoje strane, u okviru svojih mogućnosti i u punoj koordinaciji sa entitetima, nastaviti sa naplatom tih potraživanja za račun entiteta, a sredstva koja je Distrikt već naplatio po osnovu potraživanja entiteta prema potrošačima nastala prije 1. aprila 2000. godine, će biti doznačena entitetima umanjena za proviziju koja pripada Distriktu za izvršenu uslugu. Strane su saglasne da Distrikt ovim ne garantuje stoprocentnu naplatu.
Izmirivanje međusobnih prava i obaveza entiteta i Distrikta, kao i detalji vezani za naplaćena potraživanja entiteta prema potrošačima od strane Distrikta, te dinamika, način doznačavanja tih sredstava i proviziju Distrikta, biće regulisani posebnim Aneksom ovog Sporazuma.
11. Koncept prenosne i elektrodistributivne mreže, koji će nastati nakon uspostavljanja Pododjeljenja, ne smije narušiti kvalitet i sigurnost napajanja dijelova RS i Federacije BH koji su vezani neposredno ili posredno, ili će biti povezani u budućnosti, sa elektrodistributivnom i prenosnom mrežom na području Brčko Distrikta,.

12. Svi Aneksi ovog Sporazuma, uključujući “Ekonomski uslovi” i “Tehnički uslovi”, koji obuhvataju detalje navedene u tačkama 5, 8 i 10, kao i sve druge elemente za koje se smatra da su neophodni za poboljšavanje Sporazuma o snabdjevanju Brčko Distrikta električnom energijom, biće kompletirani i sprovedeni od strane potpisnika Sporazuma u roku od 30 dana po potpisivanju ovog Sporazuma.

Ovaj Sporazum i Aneksi će predstavljati cjelinu Sporazuma o snabdjevanju Brčko Distrikta električnom energijom.

Za Vladu Brčko Distrikta
Gdin Siniša Kisić, gradonačelnik Brčkog



Za Vladu Federacije Bosne i Hercegovine
Gdin Hasan Bešlić, ministar energetike, rudarstva i industrije



Za Vladu Republike Srpske
Gdin Boško Lemež, ministar energetike i rudarstva



Zamjenik šefa OHR-a Sjever
Gdin Gerhard Sontheim

